

Bosna i Hercegovina
Federacija Bosne i Hercegovine
ZENIČKO-DOBOJSKI KANTON
OPĆINA MAGLAJ
OPĆINSKO VIJEĆE



Bosnia and Herzegovina
Federation of Bosnia and Herzegovina
ZENICA – DOBOJ CANTON
MAGLAJ MUNICIPALITY
MUNICIPAL COUNCIL

Služba Općinskog načelnika i
Općinskog vijeća

Broj: 02-04-1-350/20
Maglaj, 30.12.2020. godine

Z A P I S N I K

sa konstituirajuće sjednice Općinskog vijeća Maglaj
održane dana 30.12.2020.godine u 10:00 sati u kino sali
JU Dom kulture «Edhem Mulabdić» Maglaj

Predsjedavajuća Svjetlana Zamboni, na osnovu člana 23. Statuta Općine Maglaj, člana 14. stav 2. Poslovnika o radu Općinskog vijeća Maglaj, otvaram konstituirajuću sjednicu Općinskog vijeća Maglaj.

Na današnju sjednicu pozvani su svi vijećnici koji su na Lokalnim izborima 2020. godine osvojili vijećnički mandat i koji su u tom smislu od strane Centralne izborne komisije dobili certifikat, čime im je i zvanično potvrđen mandat od strane CIK-a. Zbog epidemioloških mjera koje su trenutno na snazi i ograničenja okupljanja, na današnju sjednicu koja ima i svečani karakter, nisu pozvani predstavnici javnih ustanova i preduzeća čiji je osnivač Općina Maglaj, niti predstavnici OSCE-a, kao i predstavnici vjerskog života.

Zamolila bih gospođu Hasanić da prozivkom utvrdimo broj vijećnika na konstituirajućoj sjednici Općinskog vijeća Maglaj.

Današnjoj sjednici Općinskog vijeća prisustvuje **25 vijećnika**.

Pri ulasku u kino salu svim vijećnicama i vijećnicima podijeljeni su Poslovnici o radu Općinskog vijeća, a Statut i Etički kodeks možete pronaći na web stranici Općine Maglaj.

Sada bih pozvala sve novoizabrane vijećnike da daju svečanu izjavu, te vas molim da svi ustanete. Također, zamolila bih vas da nakon okončanja potpišete izjavu i dostavite gospođi Hasanić.

Pozvala bih sve vijećnike i prisutne u sali da odamo dužnu počast onima koji su svoje živote ugradili u domovinu nam Bosnu i Hercegovinu, kao i svim žrtvama rata.

U skladu sa Poslovníkom o radu Općinskog vijeća, prvi korak u radu jeste formiranje Komisije za izbor i imenovanje, što je prvi preduslov za nastavak rada, pa bih pozvala predstavnike političkih partija da daju svoje prijedloge za sastav Komisije.

Vijećnik Firuz Galijašević, čestitam novom/starom načelniku na izboru i čestitam novoizabranim vijećnicima i želim nam sretan i miran dan naredne četiri godine. Klub SDP-a za Komisiju za izbor i imenovanje je predložio sljedeće: Mirza Bradarić -predsjednik, Senad Šehić- zamjenik predsjednika, Aida Bašić-član, Elvir Vehabović- član i peti član je po našem prijedlogu iz reda SDA, koga oni odluče.

Vijećnik Jasmin Begić,svima nam čestitam na izboru i imenovanju na zadane funkcije. Ispred Kluba vijećnika SDA mi ćemo predložiti da naš član bude Eldis Kusur.

Predsjedavajuća Svjetlana Zamboni, zaključujem raspravu po prijedlozima.

Pozivam vijećnike da se izjasne o prijedlogu Komisije za izbor i imenovanje, ko je za?

Z A K L J U Č A K

2.1. Imenuje se Komisija za izbor i imenovanje Općinskog vijeća Maglaj u sastavu;

- Mirza Bradarić, predsjednik
- Senad Šehić, zamjenik predsjednika
- Aida Bašić, član
- Elvir Vehabović, član
- Eldis Kusur, član

GLASALO ZA: Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić i Svjetlana Zamboni (SDP), Elvir Vehabović (NBL), Mustafa Bešić (SBB), Hajrudin Ferić (DF), Pero Mamić (HDZ), Aida Bašić (A-SDA), Adis Abdurahmanović, Jasmin Begić, Mirsad Bejzić, Safet Jašić, Eldis Kusur, Edin Osmić, Eldin Pehrat, Edin Salatović, Maid Suljaković (SDA).

Jednoglasno usvojeno.

Predsjedavajuća Svjetlana Zamboni, shodno članu 25. stav 3. Statuta Općine Maglaj, kandidata za izbor predsjedavajućeg Općinskog vijeća može predložiti Komisija za izbor i imenovanje, kao i svaki vijećnik ili grupa vijećnika. Prije nego pređemo na iznošenje prijedloga za rukovodstvo Općinskog vijeća trebali bismo se izjasniti da li će glasanje ići javno ili tajno.

Vijećnik Mirza Mešić, u svoje ime i u ime Kluba vijećnika SDP-a također želim da čestitam načelniku Mahmutagiću na osvojenom mandatu i svim ostalim vijećnicima. Želim sreću i uspjeh u radu. Klub vijećnika SDP-a je donio stav da se glasanje radi javno, to je naš prijedlog za predsjedavajućeg i dopredsjedavajućeg.

Klub vijećnika SDA saglasan da se glasa javno.

Predsjedavajuća Svjetlana Zamboni, konstatujem da ćemo glasanje vršiti javno. Predlažem da predstavnici političkih partija iznesu svoje prijedloge za predsjedavajućeg i dopredsjedavajućeg, koje ćemo uputiti Komisiji za izbor i imenovanje da utvrdi kandidate, a onda da i predloži predsjedavajućeg i dopredsjedavajućeg.

Otvaram raspravu.

Vijećnik Mirza Mešić, vezano za tačku 3. i tačku 4. Dnevnog reda, Klub vijećnika SDP-a je, pošto po Poslovniku ne stoji ništa, traži ako postoji mogućnost da se zajedno rade tačke. Klub SDP-a predlažemo dosadašnju predsjedavajuću gospođu Svjetlanu Zamboni, a za dopredsjedavajuću gospođu Aidu Bašić.

Klub SDA traži pauzu.

Vijećnik Jasmin Begić, pošto mi nemamo prijedlog za predsjedavajućeg i dopredsjedavajućeg, ja predlažem samo da se glasa pojedinačno, posebno za predsjedavajuću, a posebno za dopredsjedavajuću.

Predsjedavajuća Svjetlana Zamboni, zaključujem raspravu i pozivam Komisiju za izbor i imenovanje da se povuče i utvrdi prijedloge.

Vijećnik Mirza Bradarić, ja bih sve srdačno davas pozdravim, da svima vama čestitam na osvojenom mandatu i da nam svima poželim uspjeh i sreću u radu u naredne četiri godine u Općinskom vijeću. Komisija je konstatovala zaista da su došla dva jedina prijedloga za predsjedavajuću gospođu Svjetlana Zamboni i za dopredsjedavajuću gospođu Aida Bašić. Kolega Mirza Mešić je ispred Kluba SDP-a dao prijedlog da se glasa javno i u paketu. Komisija je stava da tako treba da ide, dakle u paketu i javno, s tim što moram naglasiti da je kolega Eldis Kusur rekao, on je bio suzdržan na samoj Komisiji, ako to bude išlo tako u paketu. Ja moam naglasiti, ako ovo bude ovako kako je bilo u paketu, da ćemo mi u Maglaju poslati jednu lijepu sliku, time što imamo u Općinskom vijeću od 25 vijećnika, imamo dvije vijećnice i da te dvije vijećnice budu u samom rukovodstvu Vijeća. Ja dajem prijedlog, kao predsjednik Komisije da se ide javno i u paketu glasati za ova dva prijedloga.

Vijećnik Hajrudin Ferić, ja se zaista nisam mislio javiti do onog svečanog dijela, da nam poželim uspjeh ovdje, ali kako smo lijepo rekli, mislim da bi poruka sa današnje sjednice trebala da bude i za naredni period, to da u skladu sa ovom lijepom, svečanom izjavom i radimo. Ja se pozivam na član 146. Poslovnika o radu Općinskog vijeća u kojem decidno i jasno kaže da se o prijedlogu za izbor, odnosno imenovanje, glasa za svakog kandidata posebno. Izuzetno se može napraviti iznimka kada je u pitanju izbor članova Komisija kao stalnih radnih tijela.

Pauza Komisija za izbor i imenovanje.

Vijećnik Mirza Bradarić, obzirom da je kolega Ferić spomenuo povredu Poslovnika. Zaista nećemo ovdje praviti nikakav problem, ovo je jedinstvena, specifična situacija koju imamo danas ovdje u Općinskom vijeću Maglaj. Dvije jedine vijećnice koje su bile u prijedlogu. Kolega Ferić se pozvao na član 146. Ja bih isto Vas zamolio da pogledate malo i član 18. u kojem stoji izbor predsjedavajućeg i dopredsjedavajućeg Općinskog vijeća. To je za izbor rukovodstva, a član 146. koji se tiče radnih tijela u Općinskom vijeću. Ja ću vas zamoliti da pogledate i član 18. u kojem ne stoji ni da se može u paketu glasati niti pojedinačno, dakle stavljeno na naš izbor. Član 18. se tiče izbora predsjedavajućeg i dopredsjedavajućeg, a član 146. vezan je za radna tijela u Općinskom vijeću. Komisija ostaje pri svom stavu i prijedlogu da se glasa u paketu i javno.

Predsjedavajuća Svjetlana Zamboni, nakon što je Komisija iznijela svoj stav, dakle da se glasa za jedini prijedlog koji je iznesen za rukovodstvo Općinskog vijeća, vijećnica Svjetlana Zamboni za predsjedavajuću i vijećnica Aida Bašić za dopredsjedavajuću.
Ko je za?

Z A K L J U Č A K

3.1. Za predsjedavajuću Općinskog vijeća Maglaj imenuje se gospođa Svjetlana Zamboni.

Z A K L J U Č A K

4.1. Za zamjenika predsjedavajućeg / dopredsjedavajućeg Općinskog vijeća Maglaj imenuje se gospođa Aida Bašić.

GLASALO ZA: Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić i Svjetlana Zamboni (SDP), Elvir Vehabović (NBL), Mustafa Bešić (SBB), Hajrudin Ferić (DF), Pero Mamić (HDZ), Aida Bašić (A-SDA), Adis Abdurahmanović, Jasmin Begić, Mirsad Bejzić, Safet Jašić, Eldis Kusur, Edin Osmić, Eldin Pehrat, Edin Salatović, Maid Suljaković (SDA).

Jednoglasno usvojeno.

Predsjedavajuća Svjetlana Zamboni, ovim smo zapravo okončali dio konstituirajuće sjednice. Htjela bih da napomenem da su formirani klubovi vijećnika do sada u Općinskom vijeću, Klub SDP-a koji broji 11 vijećnika i Klub SDA koji broji 9 vijećnika. Klub SDP-a odredio je predsjednika Kluba to je Mirza Mešić, te njegovog zamjenika to je Senad Šehić. Klub SDA je odredio predsjednika Jasmin Begić, nisam dobila informaciju ko je zamjenik.

Načelnik općine Mirsad Mahmutagić, svim vijećnicama i vijećnicima čestitam izbor u Općinsko vijeće Maglaj u mandatu 2020-2024. Vjerujem da ćemo imati uspješan rad. Ovo je jedno od Vijeća kada imamo najmanje vijećnica, ali evo barem smo toliko osjetljivi, da smo dvije vijećnice koje imamo, izaberemo za rukovodstvo Općinskog vijeća. I ja gospođi Svjetlani Zamboni i gospođi Aidi Bašić čestitam na ovom izboru. Vjerujem da ćete s uspjehom voditi ovo Vijeće, da će vam vijećnici pomoći u tome i ja vam želim svako dobro u budućem radu. Također ću reći da sam na raspolaganju svim vijećnicama koji žele raditi za dobrobit ovog grada i njegovih građana. Stojim vam na raspolaganju, dakle sve što treba i ja kao načelnik i resorne Službe za bilo koju informaciju, pomoć, pojašnjenje. Također ću iskoristiti priliku da čestitam katolički Božić svim vjernicima katolicima, svim vjernicima pravoslavne vjere čestitam nadolazeći Božić, a svim građanima, Bosancima i Heregovcima želim sretnu Novu 2021. godinu. Nadam se da će ova pandemija koja je poprilično izazvala problema širom svijeta, uskoro biti iza nas. Još jednom svako dobro i sretno.

Predsjedavajuća Svjetlana Zamboni, evo u svoje ime, a vjerujem i u ime gospođe Bašić, zahvaljujem vam se na ukazanom povjerenju. Svoje četverogodišnje iskustvo ću koristiti i u


budućem radu. Osjećam se mnogo sigurnije kada pored mene sjede ove krasne dame, koje su po struci obje pravnice. Vjerujem da će znanje i iskustvo gospode Hasanić kao i u prethodnom mandatu, a posebno evo i novo iskustvo koje će steći gospoda Aida, sa svojim zanjem da će doprinijeti što uspješnijem i što boljem radu Općinskog vijeća u mandatu 2020-2024.

Dopredsjedavajuća Aida Bašić, čestitam novom/starom načelniku na ponovnom mandatu, a vama svima, također na osvojenom mandatu. Zahvaljujem vam se od srca jer ste jednoglasno podržali Svjetlanu i mene. To pokazuje da ste prije svega pravi muškarci, džentlimeni. Ja se nadam da ćemo mi raditi u interesu svih građana. Ja vjerujem da hoću i znam da hoću. Moje je novo neko iskustvo, ali ću se truditi da ostavim dobar utisak prije svega.

Predsjedavajuća Svjetlana Zamboni, ovim smo završili konstituirajuću sjednicu, ja vam se zahvaljujem na uspješnom radu.

Zaključujem konstituirajuću sjednicu Općinskog vijeća u 11:15 sati.

Zapisničar,
Arnela Tumbić



PREDSJEDAVAJUĆA
Svjetlana Zamboni

